


## Gherdëina per l 15ejim iede campion de Südtirol

L Gherdëina l vënc inò l titul da campion provinziel a scuadres. Nchin al'ultimo se tratòvela de chi che fossa diventà campion chëst ann. La prima squadra dla Lia Schach Gherdëina se à, cun na vënta tlera tl undescejim y ultim di de campjunat, merità de vëncer chësc titul



*I jugadëures de Schach dl Gherdëina I, che se à inò davanià l titul da champions provinziei.*

**Schach** - Serie A: Tla finela a Steinegg/Stanecia, che ie stata n sada ai 31 de merz, à l Gherdëina I inò pudù se prejenté cun si furnazion plu sterscia per bater l ultimo averser, l Richter/Lask de Bulsan, che ova venciù l titul l ann passà.

Davia che la squadra bulsanina ova te si furnazion trëi jugadëures stersc, ma nce trëi rerserves, ne

se à i ladins nia fat plu che n tantert. Cun gran cunzentrazion y determinazion à Ruben Bernardi, Stefan Moroder, Martin Oberrauch, Thomas Moroder y Franz Prinoth venciù si partides y l capitano Rainer Demetz à valivà ora la sia, ferman l resultat a n 5,5 a 0,5 sèch. Da auzé ora iel la prestazion de Ruben Bernardi sun prima mèisa, che ie stat bon de ti

vester a si averser Stefano Moncher te mé 17 mosses! Nsci ne n'ie l'ancunteda danter l Merania y l Gries Bulsan, che ie fineda via per 2,5 a 3,5, nia plu stata de mpurtanza per i nosc. L Gherdëina ie diventà cun merit prim, cun 20 ponc de squadra y 47,5 ponc de mèisa. Segundo ie l Merania y terzo l Gries Bulsan, tramedoi cun 18 ponc. L se trata dl 15ejim titul per

l Gherdëina, n record unich tla storia dl Schach te Südtirol. Chisc ie stac i jugadëures, aldò dla numerazion dla mèises, che à fat a na moda che n à arjont chësc bel suzes: Ruben Bernardi (5,5 ponc sun 11 partides), Rainer Demetz (9,5 sun 11 partides), Stefan Moroder (7,5 sun 10), Martin Oberrauch (4,5 sun 5), Thomas Moroder (9 sun 11), Franz Prinoth (8 sun 11), Christian Grossi (2 sun 3), Herbert Grossrubatscher (1 sun 3) y Manuel Taschler (0,5 sun 1). Duc à dat si gran contribut ala vënta, ma te chësta ucajian iel da lecurdé l merit dl veteran Franz Prinoth, che cun si 75 ani à mo n druch, na arteniensa y dedizion sciche n jëunn de 20 ani! La Lia Schach Gherdëina dedichea chësc titul cun ringraziament ala memoria de Benedikt Bernardi, che nes à lascia ai 24 de nuvëmber 2011, avisa danter l segundo y terzo di dl campjunat.

### L Gherdëina II al decimo post toma ju tla serie C

Serie B: L Gherdëina II, metan adum i jugadëures plu stersc a despusizion, à cialà de fé dl dut per ti vester ala segunda squadra dl Richter/Lask Bulsan. Ma la ne à nia butà y duta la cin' partides

ie ala fin unides perdudes cun n resultat finel de 0 a 5. A chësta maniera ie l Gherdëina II restà al 10. plazament dla tlassifica cun 5 ponc de squadra y 22 ponc de mèisa, massa puech per pudèi resté tla serie B. Chisc fova i jugadëures dl Gherdëina II: Christian Grossi (2 sun 3 partides), Herbert Grossrubatscher (0,5 su 2 partides), Matteo Scola (1,5 sun 5), Andreas Runggaldier (0,5 sun 1), Klaus Knottner (3,5 sun 11), Johann Grossrubatscher (2,5 sun 8), Manuel Taschler (1,5 sun 2), Bruno Goller (4 sun 10), Rifat Kazazi (4,5 sun 6), Richard Moroder (0,5 sun 2), Iacun Prugger (0,5 sun 1), Siegfried Senoner (0 sun 2), Paoline Taschler (0 sun 1), David Dejori (0,5 sun 1). Sambèn che l capitano Bruno Goller ne à nia for pudù se nuzé de si mièur jugadëures, danter l auter ajache i ie unich mpreste ora per bën set iedesc ala prima squadra y ne à nianca no pudù jughé cun na cërta regolarità per la segunda, ma nce i altri jugadëures ne n'ie nia stac a despusizion coche l fossa stat de bujën y l travert de se salvé dal tumé ju de categoria ne n'iesen nsci nia stac boni de arjonjer. N auter ann cialeràn de vëncer la serie C per ruvé riesc inò tla serie B, ulache toca la segunda squadra dla Lia Schach Gherdëina.